

Homenahe na Robert Jeandor y 34 aña di historia di Voz-i-Landia

ORANJESTAD – Dialuna ultimo a tuma luga na Cas di Cultura e homenahe dedica na e musico Robert Jeandor recordando 40 aña di su trayectoria artistico internacional pa medio di un documental.

E evento aki tabata uno masha special, pasobra el a wordo combina tambe pa recorda 34 aña di historia di e Festival Voz-i-Landia Escolar for di 1981 te 2015. E festival aki a bira un plataforma pa promove y descubri varios talento musical di nos isla, entre otro Edjean Semeleer y Czar Olarte, kende tambe a yega di proyecta su mes internacionalmente.

Na aña 1979 Robert Jeandor a cuminsa su carera musical na Republica Dominicana, ora e musico Johnny Ventura a yam'e pa forma parti di e banda musical Los Hijos del

Rey. E anochi di e homenahe aki Robert Jeandor masha emociona a deleita cu su musica contagioso e publico presente den un Cas di Cultura practicamente yen.

Tambe a keda presenta e buki di sra. Jennifer (Jenni) Laclé-Boezem, caminda 34 aña di e historia di e Festival Voz-i-Landia Escolar a keda condensa den un obra bon documenta y produci. Un deseo general durante e evento aki tabata cu Festival Voz-i-Landia Escolar no mester muri, sino cu mester rescate, ya cu e ta un plataforma pa descubri talentonan musical nobo.

E buki di sra. Laclé-Boezem tabata disponibel durante e evento aki. Awor e ta accesibel na e boekhandelnan local y cerca e promotor cultural Mirto Laclé, kende ta Jenni su casa.

